



## **SIARAN MEDIA**

### **BICARA NEGARAWAN EKSKLUSIF: TUN ABDUL RAZAK BIN DATO' HUSSEIN**

**KUALA LUMPUR:** 31 MAC 2022 – YB Dato' Sri Hajah Nancy Shukri, Menteri Pelancongan, Seni dan Budaya hari ini merasmikan Bicara Negarawan Eksklusif : Tun Abdul Razak bin Dato' Hussein di Dewan Tun Rahah, Memorial Tun Abdul Razak. Bicara Negarawan Eksklusif : Tun Abdul Razak bin Dato' Hussein diadakan bersempena memperingati 100 tahun tarikh kelahiran Tun Abdul Razak bin Dato' Hussein. Majlis ini adalah anjuran Arkib Negara Malaysia, salah sebuah jabatan di bawah Kementerian Pelancongan, Seni dan Budaya dengan kerjasama Yayasan Tun Razak.

Abdul Razak bin Hussein dilahirkan pada 11 Mac 1922 di Pulau Keladi, Pekan, Pahang. Beliau adalah putera sulung kepada pasangan Dato' Hussein bin Mohd Taib dan Teh Fatimah binti Daud yang merupakan golongan bangsawan berbangsa Bugis di Pahang. Bapanya pernah berkhidmat sebagai Pegawai Daerah Bentong dan diberi gelaran Orang Kaya Indera Syahbandar dan Orang Kaya Berempat Pahang.

Sumbangan Tun Abdul Razak dapat dilihat semenjak zaman sebelum merdeka apabila beliau terlibat bersama Almarhum Tunku Abdul Rahman Putra Al-Haj memperjuangkan kemerdekaan negara daripada British. Pada 1955, Allahyarham (Tun Abdul Razak bin Dato' Hussein) telah dilantik sebagai Menteri Pelajaran di bawah Kabinet pertama negara. Sebagai Menteri Pelajaran pertama, beliau memainkan peranan penting dalam membentuk asas awal sistem pendidikan negara yang dilihat amat perlu bagi menggantikan sistem pendidikan penjajah yang diguna pakai pada waktu itu.

Tun Abdul Razak bin Dato' Hussein mengambil alih jawatan Perdana Menteri daripada Almarhum Tunku Abdul Rahman pada 22 September 1970 dan beliau telah memperkenalkan Dasar Ekonomi Baru (DEB) yang menekankan strategi serampang dua mata iaitu membasmi kemiskinan dan menyusun semula masyarakat bagi mewujudkan keharmonian dan perpaduan. Bagaimanapun, Tun Abdul Razak bin Dato' Hussein tidak dapat merencanakan lebih banyak pembangunan negara apabila menghembuskan nafas terakhir pada 14 Jan 1976 akibat penyakit leukemia pada usia 53 tahun.

Walaupun tempoh beliau menjawat jawatan Perdana Menteri adalah singkat, sumbangannya kepada negara sememangnya tidak dapat dipertikaikan dan akan dikenang sepanjang zaman. Gelaran 'Bapa Pembangunan' yang diberikan kepadanya adalah di atas sumbangannya dalam meletakkan batu asas kepada sistem pembangunan negara terutama kemajuan ekonomi di luar bandar, sehingga berjaya mencorakkan negara ini ke arah pembangunan seperti yang dinikmati pada hari ini.

Bersempena dengan Bicara Negarawan Eksklusif ini Arkib Negara Malaysia menjemput seorang tokoh pembicara yang pernah menjadi salah seorang penasihat kepada Tun Abdul Razak iaitu YBhg. Tan Sri Kamarul Ariffin bin Mohamed Yassin untuk berkongsi pengalamannya berkhidmat dengan bekas Perdana Menteri kedua tersebut. Moderator yang mengemudi sesi bicara ini ialah YBhg. Prof. Dato' Dr. Hasan bin Mad, Setiausaha Agung, Majlis Perundingan Melayu.

Bicara Negarawan adalah sebuah majlis yang dianjurkan oleh Arkib Negara Malaysia melalui Bahagian Arkib Negarawan untuk membicarakan peranan dan sumbangan tokoh-tokoh negarawan dalam pembangunan negara. Ini sebahagian daripada peranan Arkib Negara Malaysia dalam melahirkan masyarakat yang mempunyai jati diri yang tinggi serta cintakan sejarah negara. Pada 14 Februari lalu, Arkib Negara Malaysia telah menganjurkan Bicara Negarawan: Pemikiran dan Kepimpinan Tun Hussein Onn, kali ini giliran Tun Abdul Razak bin Dato' Hussein pula kerana memperingati 100 tahun tarikh kelahiran kedua-dua tokoh Perdana Menteri ini yang dilahirkan pada tahun 1922.

Adalah diharapkan Bicara Negarawan Eksklusif ini berjaya mencapai matlamat serta objektif yang telah ditetapkan iaitu para peserta program dapat menyelami pemikiran dan kepimpinan Tun Abdul Razak bin Dato' Hussein supaya dapat dijadikan inspirasi kepada masyarakat khususnya generasi muda. Arkib Negara Malaysia juga berharap program seperti ini dapat menunjukkan penghargaan dan menyuburkan ingatan terhadap sumbangan dan jasa Tun Abdul Razak bin Dato' Hussein sepanjang mentadbir negara serta menjadi platform untuk berkongsi keperibadian Tun Abdul Razak bin Dato' Hussein bagi menambah koleksi bahan dan maklumat baharu mengenai beliau sebagai rujukan penyelidik pada masa hadapan.

**ARKIB NEGARA MALAYSIA**  
**31 MAC 2022**

---

Untuk maklumat lanjut, sila hubungi: -  
Seksyen Perhubungan Awam dan Promosi  
Arkib Negara Malaysia,  
Tel: 03-6209 0671/0672/0673/0674  
Emel: [pro@arkib.gov.my](mailto:pro@arkib.gov.my)